

**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ**  
**ԷԿՈՆՈՄԻԿԱՅԻ ՆԱԽԱՐԱՐՈՒԹՅԱՆ**  
**ՄՏԱԿՈՐ ՍԵՓԱԿԱՆՈՒԹՅԱՆ ԳՈՐԾԱԿԱԼՈՒԹՅԱՆ**  
**ԲՈՂՈՔԱՐԿՄԱՆ ԽՈՐՀՐԴԻ**  
**Ո Ր Ո Շ ՈՒ Մ**  
**№ 75/09**

**Քաղ. Երևան**

**23 հոկտեմբերի 2009թ.**

Հայաստանի Հանրապետության Էկոնոմիկայի նախարարության մտավոր սեփականության գործակալության բողոքարկման խորհուրդը (այսուհետ՝ նաև բողոքարկման խորհուրդ) հետևյալ կազմով՝ խորհրդի նախագահ Ա.Ֆ.Ազիզյան, անդամներ՝ Ա.Ս.Խաչիկյան, Ա.Ա.Տոնիկյան, Բ.Շ.Վարդանյան, Ա.Վ.Բաբայան և Լ.Ե.Ասցատրյան (քարտուղար), իր 2009թ. հոկտեմբերի 23-ի նիստում (արձանագրություն № 74/2) քննարկեց «Գրանդ Քենդի» հայ-կանադական ՀԶ ՍՊԸ-ի 2009թ. օգոստոսի 21-ի դիմումը (մտից հ.627, 21.08.09թ.)՝ POLO IR 573045 ապրանքային նշանի գրանցման գործողությունը չօգտագործման պատճառով ԱՃՄԴ-ի 30-րդ դասի ապրանքների համար վաղաժամկետ դադարեցնելու խնդրանքով:

Դիմողի փաստարկները հետևյալն են:

Դիմողը դիմումում նշել է, որ 1999թ. հունվարի 10-ին Մտավոր սեփականության համաշխարհային կազմակերպությունը ՀՀ մտավոր սեփականության գործակալությանը ծանուցել է ԱՃՄԴ 30-րդ դասի ապրանքների համար IR 573045 միջազգային գրանցմամբ POLO համակցված ապրանքային նշանի գրանցման գործողության տարածման մասին: Գրանցման մասին հրապարակվել է 1999/2 LMi, 19.04.1999թ.:

Սակայն «Գրանդ Քենդի» Հայ-Կանադական ՀԶ ՍՊԸ-ի կողմից Երևան քաղաքում և Հայաստանի Հանրապետության մի շարք մարզերում կատարված մարքետինգային ուսումնասիրությունների և հետազոտությունների արդյունքում պարզվել է, որ POLO ապրանքային նշանը իր սեփականատիրոջ՝ SOCIÉTÉ DES PRODUITS NESTLÉ S.A. (CH) ընկերության կողմից գրանցման պահից սկսած չի օգտագործվել և չի օգտագործվում ԱՃՄԴ 30-րդ դասի գրանցված բոլոր ապրանքների համար ավելի քան 5 տարի:

Ելնելով դրանից և առաջնորդվելով «Ապրանքային և սպասարկման նշանների, ապրանքի ծագման տեղանունների մասին» ՀՀ օրենքի (այսուհետ նաև օրենք) 22-րդ հոդվածի 4-րդ մասով, համաձայն որի «Ապրանքային նշանի գրանցման գործողությունը կարող է ցանկացած անձի դիմումի հիման վրա, բողոքարկման խորհրդի որոշմամբ, դադարեցվել վաղաժամկետ բոլոր ապրանքների, որոնց համար այն գրանցված է, կամ դրանց մի մասի նկատմամբ, եթե ապրանքային նշանի գրանցման թվականից հաշված 5 տարվա ընթացքում, կամ դիմումն ավելի ուշ ներկայացնելու դեպքում՝ դրան անմիջականորեն նախորդող 5 տարվա ընթացքում այն ընդհանրապես չի օգտագործվել կամ

օգտագործվել է ոչ ողջամիտ ծավալներով ապրանքային նշանի սեփականատիրոջ կամ օրենքի 26 հոդվածի համաձայն՝ լիցենզային պայմանագրով այդ իրավունքն ունեցող անձի կողմից», դիմողը խնդրել է POLO IR 573045 ապրանքային նշանի գրանցման գործողությունը Հայաստանի Հանրապետության տարածքում վաղաժամկետ դադարեցնել ԱԾՄԴ-ի 30-րդ դասի գրանցված բոլոր ապրանքների համար:

Բողոքարկման խորհուրդը «Հայաստանի Հանրապետության Էկոնոմիկայի նախարարության մտավոր սեփականության գործակալության բողոքարկման խորհուրդ բողոքների և դիմումների ներկայացման և քննարկման կարգի» 36-րդ կետի համաձայն 27.08.09թ. հետձանուցմամբ փոստային առաքմամբ տեղեկացրել է POLO IR 573045 ապրանքային նշանի սեփականատեր՝ SOCIÉTÉ DES PRODUITS NESTLÉ (CH) ընկերությանը (CH-1800 VEVEY, Switzerland), ինչպես նաև ROMARIN ապրանքային նշանների միջազգային գրանցումների հիմնապաշարում նշված նրա ներկայացուցչին՝ Nestlec S.A. ընկերությանը (Av. Nestlé 55 CH-1800 VEVEY Switzerland), բողոքարկման խորհրդի կողմից «Գրանդ Քենդի» Հայ-Կանադական ՀԶ ՍՊԸ-ի 2009թ. օգոստոսի 21-ի դիմումը քննարկման ընդունելու, նիստի անցկացման թվականի (2009թ. հոկտեմբերի 23) և վայրի մասին՝ կցելով դիմումի պատճենը:

Չնայած դրան, որ հասցեատերերի կողմից ծանուցումները ստացվել են 2009թ. սեպտեմբերի 4-ին, և նրանք ունեին ողջամիտ ժամկետ՝ նշված դիմումի վերաբերյալ սեփականատիրոջ նկատառումները բողոքարկման խորհուրդ ներկայացնելու համար, սակայն բողոքարկման խորհրդի 2009թ. հոկտեմբերի 23-ի նիստին սեփականատիրոջ որևէ ներկայացուցիչ չի ներկայացել, ինչպես նաև բողոքարկման խորհուրդը դիմումի վերաբերյալ որևէ գրավոր արձագանք սեփականատիրոջից կամ նրա ներկայացուցչից չի ստացել:

Քննարկելով ներկայացված նյութերը դիմումում բերված հիմնավորումների շրջանակներում, հաշվի առնելով կոլեգիայի նիստում բողոքի ըստ էության քննարկման արդյունքները, բողոքարկման խորհուրդը հանգեց հետևյալ եզրակացության:

Օրենքի 22-րդ հոդվածի 4-րդ մասի համաձայն ապրանքային նշանի օգտագործման ապացույցները ներկայացնում է դրա սեփականատերը, տվյալ դեպքում՝ SOCIÉTÉ DES PRODUITS NESTLÉ S.A. (CH) ընկերությունը, որի պատշաճ ծանուցելու հնարավորությունները սպառված են, նկատի ունենալով 27.08.09թ. հետձանուցմամբ փոստային առաքմամբ ուղարկած ծանուցումները, սակայն ապրանքային նշանը ԱԾՄԴ-ի 30-րդ դասի ապրանքների համար ՀՀ-ում օգտագործելու վերաբերյալ որևէ փաստ, ապացույց կամ որևէ գրավոր արձագանք սեփականատիրոջից կամ նրա ներկայացուցչից այդպես էլ չի ներկայացվել: Ելնելով դրանից, բողոքարկման խորհուրդը համարում է, որ SOCIÉTÉ DES PRODUITS NESTLÉ S.A. (CH) ընկերության POLO IR 573045 ապրանքային նշանը չօգտագործելու վերաբերյալ «Գրանդ Քենդի» Հայ-Կանադական ՀԶ ՍՊԸ-ի 2009թ. օգոստոսի 21-ի դիմումում բերված փաստարկները հերքելու հիմքեր չկան, և դիմումը ենթակա է բավարարման:

Ելնելով դրանից և ղեկավարվելով օրենքի 22-րդ հոդվածի 4-րդ մասով, ինչպես նաև «Հայաստանի Հանրապետության առևտրի և տնտեսական զարգացման նախարարության մտավոր սեփականության գործակալության բողոքարկման խորհուրդ բողոքների և դիմումների ներկայացման և քննարկման կարգի» 80-րդ կետի 1-ին ենթակետով բողոքարկման խորհուրդը

### Ո Ր Ո Շ Ե Ց

Բավարարել «Գրանդ Զենդի» Հայ-Կանադական ՀԶ ՍՊԸ-ի 2009թ. օգոստոսի 21-ի դիմումը ամբողջովին և SOCIÉTÉ DES PRODUITS NESTLÉ S.A. (CH) ընկերության POLO IR 573045 ապրանքային նշանի գրանցման գործողությունը ամբողջովին վաղաժամկետ դադարեցնել Հայաստանի Հանրապետության տարածքում 30-րդ դասի ապրանքների համար:

Բողոքարկման խորհրդի որոշումը կարող է «Ապրանքային և սպասարկման նշանների, ապրանքների ծագման տեղանունների մասին» ՀՀ օրենքի 28-րդ հոդվածի 3-րդ կետի համաձայն վիճարկվել դատական կարգով՝ այդ որոշումն ընդունելու օրվանից 6-ամսյա ժամկետում:

Բողոքարկման խորհրդի  
Նախագահ

Ա.Ազիզյան